

Kekchi - Ixaqil Santil Hu - Wives Scriptures

Efesios 5:22-24 Eb' li ixq che'xpaab' li xb'eelom jo' naq neke'xpaab' li Qaawa', 23 xb'aan naq li b'eelomej a'an xjolomil li ixaqilb'ej jo' li Kriist a'an xjolomil li Iklees, ut tz'aqal aj kolol re li xtz'ejwal. 24 Jo' naq li Iklees naxpaab' li Kriist, jo'kanaqeb' ajwi' eb' li ixq: che'xpaab' li xb'eelom rik'in chixjunil.

Efesios 5:31,33 Jo' naxye li Santil Hu: "Li winq tixkanab' xna' xyuwa', tixlaq'ab' rib' rik'in li rixaqil, ut junajaqeb' aj chik chi tz'ejwalej te'kanaaq chi xcab'ichaleb"". 33 Jo'kan utan li junjunq sa' eeyanq chixra li rixaqil jo' naq naxra rib'; ut li ixaqilb'ej chiroxloq'i li xb'eelom.

1 Corintios 7:3 Li b'eelomej chixk'e re li rixaqil jo' li teneb'anb'il sa' xb'een; jo'kan ajwi' chixb'aanu li ixaqilb'ej rik'in li xb'eelom.

1 Corintios 7:34 Li ixq ink'a' sumsu jo' ajwi' li tuq'ixq naxik xch'ooleb' chirix li k'a' re ru re li Qaawa', re naq santaqeb' li xjunxaqalil ut li xmusiq'. A'ut li sumsu naxik xch'ool chirix li k'a' re ru re li ruuchich'och', jo' chanru taawulaq chiru li xb'eelom.

Colosenses 3:18 Ex ixaqilb'ej, chepaab' leeb'eelom jo' xk'ulub' sa' xk'ab'a' li Qaawa'.

1 Timoteo 2:11-15 Eb' li ixq sa' li ch'utam che'ab'inq chi chaab'il ut che'paab'anq chi us. 12 Ink'a' nawaj naq eb' li ixq che'xtzoleb' li winq chi moko che'xk'e xwankil sa' xb'eeneb'; nawaj b'an naq wanqeb' sa' q'unil ch'oolej. 13 Xb'aan naq xb'enwa kiyob'tesiik laj Adán ut moqon chik lix Eva. 14 Ut li kib'alaq'iik maawa' laj Adán, a' b'an li ixq li kiq'unb'esiik ut ki'ok chi q'etok aatin. 15 Ab'anan taakole'q sa' xk'ab'a' naq na'b'ej, wi junelik kawaq xch'ool sa' li xpaab'aal, sa' li rahok, santilal, ut rik'in q'unil ch'oolej.

Génesis 3:16 Li Qaawa' Yos kixye re li ixq: "Naab'al li rahilal tinteneb' sa' aab'een jar wa wanqat sa' yu'am, ut rik'in rahilal tat-alanq. Ab'an taawataw ru laab'eelom ut a'an taataqlanq sa' aab'een".

1 Pedro 3:1,2 Jo'kan ajwi' laa'ex ixaqilb'ej, chepaab'aq leeb'eelom. Chi jo'kan wi wanqeb' li ink'a' neke'paab'ank re li Aatin, te'ok chi paab'ank: ink'a' xb'aan leeraatin laa'ex, sa' xk'ab'a' b'an leeb'aanuhom, 2 rik'in xk'eeb'al reetal li xchaab'ilal leeyu'am, k'ajo'aq xtuanil leech'ool.

Tito 2:1-5 A'ut laa'at chak'utaq li xk'ulub' tzole'k chirix li chaab'il na'leb'. 2 Chaye reheb' li cheekel winq naq che'xnawaq wank sa' xyaalal, wanqeb' xna'leb', yaalaq ru li raatineb', chaab'ilaqeb' xch'ool sa' li paab'aal ut sa' li rahok, kawaqeb' sa' li kuyuk. 3 Jo'kanaqeb' ajwi' li cheekel ixq: che'wanq xloq'aleb' li xyu'am jo' xk'ulub'eb' laj santil paab'anel; maawa'aqeb' aj yoob'anel aatin chi moko aj kalajenaqeb', a'anaqeb' b'an aj k'utul re li chaab'ilal, 4 re te'xk'ut chiruheb' li saaj ixaqilb'ej xraab'aleb' li xb'eelom jo'wi' eb' li ralal xk'ajol. 5 Yaalaq ru li raatineb', saqaq ru li xyu'ameb', che'xch'oolani xsa' li rochocheb' ut chaab'ilaqeb'; che'paab'anq chiru li xb'eelomeb' re naq li Raatin li Yos ink'a' sachb'ilaq xwankil.

Proverbios 12:4 Li ixq chaab'il xna'leb', a'an xloq'al li xsum'aatin; a'ut li ink'a' us xna'leb' naxpo' xch'ool chi junwaakaj.

Proverbios 14:1 Li ixq seeb' xk'a'uxl naxch'oolani li xjunkab'al; li maak'a' xna'leb', a'an ajwi' najuk'uk re li xjunkab'al.

Proverbios 19:13 Li alalb'ej maak'a' xna'leb' naxk'e xtib'l xjolom li xyuwa'; ut li ixaqilib'ej aj raaxiik' a'an kama' li okes na'ok sa' li kab'l.

Proverbios 21:9,19 Jwal us li wank sa' kuukil ochoch chiru li wank sa' chaab'il kab'l rochb'een junaq josq' aj ixq. 19 Jwal us li wank sa' chaqich'och' chiru li wank sa' chaab'il kab'l rochb'een junaq josq' aj ixq.

Proverbios 25:24 Jwal us li wank sa' kuukil ochoch chiru li wank sa' chaab'il kab'l rochb'een junaq josq' aj ixq.

Proverbios 27:15,16 Jun li ixq aj raaxiik', a'an kama' li okes ink'a' natz'aponk sa' hab'alq'e. 16 Xramb'al chiru, a'an jo' xchabb'al li iq' malaj jo' xchabb'al li aseeyt sa' laawuq'.

Proverbios 31:10-31 Jwal ch'a'aj xtawb'al junaq ixq chaab'il xna'leb'; q'axal loq' wi' chik chiru li lemtz'il q'ol. 11 Li xsum'aatin, k'ojk'o xch'ool rik'in a'an, xb'aan naq maajun wa taaneb'a'o'q. 12 Li ixq a'an naxb'aanu li us cho'q re li xsum'aatin, rajlal kutan, chiru chixjunil li xyu'am. 13 Naxsik' li tuuxnoq' ut li liin, ut chi anchal xch'ool natz'uluk. 14 Chanchan wi' xjukub' laj yakonel, li najt naxk'am chaq li chaab'il eecnej. 15 Toj hik'ho nawakliik ut naxk'eheb' chi wa'ak li xkok'al, ut naxjek'i xk'anjeleb' li xmoos ixq. 16 Naxsik' ut naxloq' jun siiraq li ch'och', ut rik'in li xtumin naraw li x'uub'. 17 Chi anchal xch'ool na'ok chi k'anjelak, xb'aan naq q'axal kaw rib'. 18 Naril chi us li xk'anjel re naq us taa'elq, ut ink'a' nahilank chi k'anjelak chiru q'oqyink. 19 Naxq'in li xnoq' rik'ineb' li ruq'; naxkem ut naxb'ojeb' li xb'aatal. 20 Junelik naxtenq'aheb' li neb'a' ut narileb' li wankeb' sa' rajb'al ru. 21 Ink'a' nak'oxlak chirix li ke, xb'aan naq ka'taheb' li raq' chixjunileb' sa' li xjunkab'al. 22 A'an ajwi' naxkem li risb' ut naxtiqb' rib' rik'in chaab'il t'ikr. 23 Li xsum'aatin jwal nawno ru sa' li tenamit, naq nak'ojlaak sa' xyanqeb' li cheekel winq. 24 Nakemok aq'ej ut k'aamal sa', ut naxk'ayi reheb' laj yakonel. 25 Naxtiqb' rib' rik'in loq'al ut kawilal, ut ink'a' nak'oxlak chirix li kutan chaalel. 26 Na'aatinak junes rik'in chaab'il na'leb', ut naxtijeb' li xkok'al rik'in rahok. 27 Naxch'oolaniheb' li wankeb' sa' rochoch, ut ink'a' naxtzeka li k'aru ink'a' xk'anjela. 28 Usilaatinanb'il xb'aaneb' li ralal xk'ajol, ut li xsum'aatin naxk'e xloq'al ut naxye re: 29 "Naab'aleb' li ixq chaab'ileb' xch'ool, ab'an laa'at li q'axal chaab'il chiru chixjunileb', chan. 30 Li chaab'ilal nab'alaq'ik ut li ch'ina'usal yal nanume'k; ab'an li ixq li naroxloq'i li Qaawa', a'an xk'ulub' xk'eeb'al xloq'al. 31 K'ehomaq xloq'al li k'anjel naxb'aanu, ut chisaho'q xch'ool chixjunileb' sa' li tenamit rik'in li xb'aanuhom.